

- गृह मंत्रालय नुवी राष्ट्रीय आतंकवाद-विरोधी नीति अर रणनीति-प्रहार जारी कीनीं
- लोकसभा अध्यक्ष ओम बिरला री पहल ऊं 60 ऊं बत्ता देशां सागे संसदीय मैत्री समूह बणायी ज्यां
- मुख्यमंत्री भजनलाल शर्मा समाज ने गेलो बतावण अर सगळां ने न्याय दिरावण मांय वकीलां रो खास काम बतायों
- राज्यपाल हरिभाऊ बागडे सरपंचां ऊं गांव रा विकास कार्यकर्ता बणबा सारू कह्यों

000

गृह मंत्रालय नुवी राष्ट्रीय आतंकवाद-विरोधी नीति अर रणनीति-प्रहार जारी कीनी हैं ईं रा तैत आतंकवाद ने रोकण अर वां रो मुकाबलो करण सारू खास नजरियो अपनाईं ज्यां हैं मंत्रालय कह्यों के भारत हमेशा आतंकवाद री जद मांय आया लोगां सागे रह्यो है अर वां ईं बात माथे अडिग है के दुनिया मांय हिंसा रो कोई मकसद नीं व्हे सके हैं

000

नई दिल्ली रा राष्ट्रपति भवन मांय आज राजाजी उत्सव सरू व्ह्यों ओ उत्सव पहला भारतीय गवर्नर जनरल चक्रवर्ती राजगोपालाचारी री जिन्दगी अर विरासत ने समर्पित हैं ईं मौके राष्ट्रपति द्रौपदी मुर्मू चक्रवर्ती राजगोपालाचारी री मूरत रो अनावरण कीनीं कार्यक्रम मांय राष्ट्रपति कह्यों के चक्रवर्ती राजगोपालाचारी रो कमजोर तबका रा लोगां सागे जुड़ाव वां रा विचारां अर काम मांय निज़र आवे हैं राष्ट्रपति आस जताईं के देश री जनता राजगोपालाचारी री जिन्दगी अर विरासत ऊं सीख ले र राष्ट्रप्रथम री भावना ऊं आगे बढ़ेलां

.....

000

लोकसभा अध्यक्ष ओम बिरला न्यारा-न्यारा देशां सागे संसदीय रिश्तां री मज़बूती रा मकसद ऊं 60 ऊं बत्ता देशां सागे संसदीय मैत्री समूह बणाया हैं ईं रो मकसद भारत अर दूजा देशां रा सांसदां बीचे सीधी बातचीत ने बधावो देवणो हैं आं मैत्री समूहां मांय रवि शंकर प्रसाद, पी. चिदंबरम, अखिलेश यादव अर सुप्रिया सुले समेत सत्ता पख अर विपख रा केईं आला सदस्य शामिल करी ज्यां हैं अ समूह अमेरिका, रूस, जापान, जर्मनी अर इज़राइल समेत न्यारा-न्यारा देशां रा सांसदां सागे अनुभव बांटेला अर कारोबार, तकनीक अर संस्कृति सरीखा मुद्दां माथे ईं चर्चा करेलां

000

केन्द्रीय सहकारिता मंत्री अमित शाह नई दिल्ली मांय भारत टैक्सी रा सारथियां सागे बातचीत कीनीं आज जारी एक वीडियो मांय श्री शाह कह्यों के भारत टैक्सी सहकारी समिति रो मकसद गाड़ियां चलावण वाळां ने मालिक बणा र मज़बूत बणावणो हैं केन्द्रीय मंत्री कह्यों के ईं पहल ऊं गैर सरकारी टैक्सी कम्पनियां ऊं जुड़ी समस्यावां कम करण अर गाड़ियां चलावण वाळां ने फायदो दिरावण री कोशिश करी ज्यां हैं

.....

भारत टैक्सी री अनोखी सारथी दीदी पहल रो जिकर करता थकां श्री शाह कह्यों के ईं रे मार्फत महिला मुसाफिर सफर सारू महिला ड्राइवर चुण सके हैं वे कह्यों के भारत टैक्सी री सारथी महिलावां ने बीमा अर आसान कर्ज सरीखा सुबीता ईं मिलेलां वे आवता दिनां ईं एप मांय महिलावां री हिफाजत सारू खास जतन शामिल करण री आस जताईं

000

मुख्यमंत्री भजनलाल शर्मा कह्यो है के समाज ने गेलो बतावण अर आखिरी पांत मांय ऊबा लोगां ने न्याय दिरावण मांय वकीलां रो खास काम व्हे हैं वे आज दी बार एसोसिएशन जयपुर रा शपथ ग्रहण समारोह मांय बोल रह्या हां श्री शर्मा कह्यो के वकील कम ऊं कम शब्दां मांय पूरी बात बता र न्याय दिरावण रो काम करे हैं मुख्यमंत्री कह्यो के लोकतंत्र ने मजबूत बणावण सारू विधायिका, कार्यपालिका अर न्यायपालिका रो तालमेल घणो जरूरी हैं

.....

000

राज्यपाल हरिभाऊ बागडे कह्यो है के सरपंचां ने गांव रा विकास कार्यकर्ता बणबा सागे देश रा विकास ने बधावो देवण वाळा ई बणणो चाहिजे वे आज जयपुर मांय राख्यी ज्या 'ग्राम संसद' कार्यक्रम मांय सरपंचां ने बतळा रह्या हां राज्यपाल पंचायतां ने योजना बणा र गांवां रो विकास करण बाबत् कह्यो श्री बागडे सरपंचां ऊं गांवां री स्कूलां अर जनता रे काम आवण वाळी इमारतां रा हालात माथे निगराणी राखण अर बच्चां री भणार्ई-लिखाई माथे खास ध्यान देवण सारू कह्यो वे नंदी संरक्षण, गौपालन अर 'हर घर जल' योजना ने असरदार तरीका ऊं लागू करण माथे ई जोर दीनों कार्यक्रम के दौरान राज्यपाल गांवां मांय बेहतरीन काम करण वाळां लोगां रो मान ई कीनों

000

प्रधानमंत्री आवास योजना री अटक्योड़ी किश्तां रा चुकारा सारू राज्य मांय खास अभियान चलायो जावेलां ग्रामीण विकास मंत्री डॉ. किरोड़ीलाल मीणा विधानसभा मांय आ जाणकारी दीनीं वे बतायो के पोर्टल माथे तकनीकी परेशानियां अर बैंक खाता रा सत्यापन मांय कमियां रे कारण जो चुकारा हाल ताई नी कर्या जा सक्या है, वां ने बेगा ई कर्या जावेलां मंत्री भरोसो दिरायो के किण ई पात्र जणा री रकम बेजा ई नी रोक्यी जावेलां

000

राज्य री 970 महात्मा गांधी स्कूलां मांय विज्ञान संकाय खोली ज्या है, जठे 4 हजार 850 नुवा ओहदा बणायी ज्या हैं शिक्षा मंत्री मदन दिलावर आज विधानसभा मांय प्रश्नकाल रे दौरान पूरक सवालां रा जवाब मांय आ जाणकारी दीनीं वे बतायो के नुवा ओहदां मांय 3 हजार 880 व्याख्याता अर 970 प्रयोगशाला सहायक रा पद शामिल हैं श्री दिलावर कह्यो के सरकार स्कूलां मांय नुवा संकाय खोलण सागे जरूरी तादाद मांय अध्यापक लगावण माथे ई ध्यान दे रही हैं वे बतायो के बजट मांय करी ज्या ऐलाण रे मुजब 99 स्कूलां मांय और संकाय खोलण री मंजूरी दी जा चुकी हैं

000

प्रदेश रा केई हलकां मांय आज मौसम रो मिजाज बदल्यो राजधानी जयपुर अर दौसा मांय बायरो बाजण सागे छांटो छिड़को व्ह्यो झुंझुनूं जिला मांय ई केई ठौड़ां छांटा पड्यां ई बीचे प्रदेश मांय घणखर ठौड़ां पारो सामान्य ऊं ऊंचो रह्यो बाडुमेर 34 दशमलव 6 डिग्री सेल्सियस तापमान सागे राज्य मांय सब ऊं उन्नी ठौड रह्यो, जदके अलवर मांय कमती-कम तापमान 10 दशमलव 2 डिग्री सेल्सियस दर्ज करी ज्यो

000

प्रदेश मांय आवण वाळा देशी-परदेशी सेलाणियां रा सुबीता सारू पर्यटन विभाग पर्यटक सहायता बल री सेवा मुहैया करा रह्यो हैं पर्यटन सहायता बल रा उप निदेशक संग्राम सिंह सोशल मीडिया रे जरिये बतायो के सैलाणी किण ई भांत री मदद सारू बल रा बूथ या कर्मचारियां ऊं सम्पर्क कर सके हैं

.....

000

सलूंबर जिला रा नठारा हलका मांय प्रधानमंत्री वन धन योजना रा तैत खुद सेवक समूहां री महिलावां पलाश रा फूल, पालक, नीम री पत्तियां अर तरकारियां रा अर्क ऊं कुदरती अर हर्बल गुलाल बणा रही हैं ई सारू आं महिलावां ने प्रशासन री ओर ऊं सिखावण दीरीजी अर सामान री बिक्री सारू मेळा मांय स्टॉल मुहैया कराई जा रही हैं

000

रेलवे जयपुर जिला रा नरैना मांय दादू दयाल जी मेळा रे मौके जैसलमेर-काठगोदाम-जैसलमेर गाड़ी ने काल ऊं 27 फरवरी ताई नरैना टेशन माथे दो मिनट रोकण रो फौसलो कीनो हैं जैसलमेर-काठगोदाम

गाडी दोपहरां पाछे 2 बज र 17 मिनट माथे नरैना पूगोला, जदके काठगोदाम-जैसलमेर गाडी संवारे 11 बज र एक मिनट परां नरैना टेशन माथे रूकेलां

000

केंद्रीय वाणिज्य अर उद्योग मंत्री पीयूष गोयल कह्यो है के भारत रा सामान री गुणवत्ता दुनिया मांय देश री पिछाण बणावण वाळी व्हेवणी चाहिजे वे आज नई दिल्ली मांय 'नेशनल क्वालिटी कॉन्वलेव' मांय बोल रह्या हां श्री गोयल सामान री जांच सारु नुवी प्रयोगशालावां अर ज़रूरी सुबीता मुहैया करावण मांय रकम री कमी नी आवण देवण रो भरोसो दिरायों वे एम.एस.एम.ई. कारोबारियां ने दुनिया रा बाजार री जरूरतां रे मुजब सामान बणावण सारु हर संभव सरकारी मदद रो भरोसो दिरायों

000